

四庫全書

史部

欽定四庫全書

史部

平定準噶爾方略前編卷四十八至

詳校官監察御史

臣孫家賢

通政使司副使

臣莫瞻菴覆勘

總校官進士

臣

朱鈐

校對官中書

臣

李斯咏

謄錄監生

臣

李亭植

欽定四庫全書

平定準噶爾方略前編卷四十五

乾隆五年春正月甲寅

賜準噶爾使臣哈柳等與宴

上諭哈柳等曰朕早欲賜爾等宴因筵宴我諸王及外藩王之來朝者故未暇宣召爾等此次噶爾丹策零奏章既屬恭順爾等又往返再三朕甚嘉焉今日特命爾等入內與宴可觀覽衆技不必矜持

爾等蒙古人嗜酒無妨暢飲數杯朕不爾責也

甲子

議定準噶爾貿易事宜

尚書海望等奏言臣等見準夷使臣哈柳等以所議貿易事宜示之哈柳言我等曾懇取道喀爾喀未蒙許可今議由肅州西安至肅州貿易者甚便其至京者若悉由內地未免需費較多今業已定議乞繕列條款見付以便持歸告噶

爾丹策零臣等謹錄議札先呈

御覽札云

大清朝大臣等與準噶爾來使哈柳等定議貿易事
宜爾等貿易一如俄羅斯例定期四年自備資
斧由內地至京貿易一次人數毋過二百其至
肅州貿易亦定期四年毋過百人還期悉定限
八十日凡貿易之年先期以起程之日與何日
可入境報知駐邊大臣轉達部院奏撥章京筆

帖式等照看料理其來京者令自肅州經西安一路凡貿易除禁物外俱聽其買賣不得強抑其年期不可與俄羅斯同致貨物堆積減價按定例俄羅斯以子辰申年來爾等宜以寅午戌年來其至肅州者則令于子辰申年來若噶爾丹策零別有具奏事件遣使來京令減僕從由驛站遞送不得私携貨物為此定議尋軍機大臣等議覆曰準噶爾部人性本狡詐不肖安分

若路經喀爾喀恐其日久生事故與哈柳等定
議令由內地但至京道遠或馬力罷乏若彼更
以請應否酌量加

恩奏入得

旨喀爾喀之路勿令行走若伊等從內地來京貿易
馬力不足懇恩奏請酌量賞給馬匹之處再行辦
理

辛未

議定準爾赴藏事宜

軍機大臣等奏言此次哈柳等至京一切並遵
旨定議惟進藏熬茶以百人不敷奏請用三百人蒙
恩允行其來時請令理藩院撥章京等二員前赴哈
密軍營令提督李繩武撥兵五百名遣官率領
與章京等協同辦理令由扁都口邊界前至東
科爾貿易事畢即由彼處護送至藏沿途有司
亦令照管至入藏之人非奏事使臣可比無庸

換給馬匹其經過青海等處一應蒙古游牧及各臺站豫令移置妥協俟使臣還安設如故其應撥滿洲兵護送請就近于莊浪涼州酌撥五百名與李繩武處所撥官兵以大臣一員總領至藏時有應辦一切令駐藏副都統與郡王頗羅鼐公同核議妥協辦理奏入得

旨依議著將軍烏赫圖副都統巴靈阿領兵護理各賞銀五百兩涼州將軍印務令副都統黑色暫行

署理巴靈阿所遺員缺著蟒古賴馳驛前往西寧
辦理

二月丙子

諭哲卜尊丹巴胡土克圖仍移住庫倫

上諭軍機大臣等曰哲卜尊丹巴胡土克圖寄札額
駙策凌云前蒙

世宗憲皇帝特旨令我移居多倫淖爾前歲瞻仰天顏
奉諭俟一二年後令爾仍移居庫倫今軍事已定

乞為我奏聞等語哲卜尊丹巴胡土克圖係衆喀爾喀普同供養之喇嘛前準噶爾侵犯時覬覦搶奪蒙

皇考睿鑒降旨令胡土克圖移至多倫淖爾賊人失意空還今噶爾丹策零革心悔過奏請求和邊庭無事應令哲卜尊丹巴胡土克圖仍居庫倫著軍機大臣等議奏尋議曰喀爾喀公敏珠爾原係照管胡土克圖之人應令代為辦裝更請交理藩院

撥章京一員與駐劄多倫淖爾之侍衛同送往

庫倫奏入得

旨依議但整理行裝文移知會已逢夏暑難于涉遠
俟明年青草生時酌令起程屆期著賞給胡土克
圖銀一萬兩

諭喀爾喀部落王等定游牧界址

上諭額駙策凌等曰前者喀爾喀部落游牧原有一
定疆界現今已許準噶爾和好朕特降旨今喀爾

喀游牧不過扎卜堪等處然非指明各部游牧邊界則喀爾喀等但知無過扎卜堪他處或仍任意遷移亦未可定著額駙策凌會同三部落副將軍等以扎卜堪為準令各部游牧邊界分定指明勿使妄有踰越核議具奏又

諭七旗喀爾喀王扎薩克等曰前以軍務方興恐爾喀爾喀游牧被賊侵擾悉令內徙今噶爾丹策零使哈柳等來一切並遵朕旨甚屬恭順奏請厄魯

特游牧不得過阿爾台山梁彼此烏梁海居住如
舊每年應行略地之時止遣二三十人巡察所轄
地界又奏請喀爾喀游牧無過扎卜堪等處乞朕
降旨指定界址故朕特旨令爾喀爾喀游牧毋越
扎卜堪齊克濟喀薩克圖庫克嶺等處爾喀爾喀
王扎薩克等其仰體朕言遍諭屬人勿踰所定之
界永遠遵行倘有違令生事者即嚴加治罪勿宥
現今雖許其和好罷息干戈而平日不可不訓習

兵丁操練技勇爾等其留意無忽

已卯

賜準噶爾台吉噶爾丹策零勅書

奉

天承運

皇帝詔曰諭準噶爾台吉噶爾丹策零朕為闡教安
民之故降旨息兵往者以疆界必宜定議爾台吉
雖數遣使來輒以必不可行之事借端要請是以

議久不決前年爾遣哈柳入奏請厄魯特毋得越
阿爾台山梁喀爾喀仍居扎卜堪等處此即與定
議無異又請布延圖托爾和兩處卡倫稍向內移
朕以卡倫不可移動之故降旨開示令哈柳齎還
今台吉復遣哈柳來辭甚恭順且謹遵朕旨每年
止遣二三十人巡察科卜多其卡倫請仍設置如
舊朕覽之欣悅但原議以阿爾台山陽至哈卜塔
克拜塔克烏蘭烏蘓羅卜淖爾噶斯口為界今奏

中尚未聲明故朕之大臣詳問哈柳據稱以阿爾
台山為界業已指明山南之人仍住原處自不待
言何庸復議觀此則一切俱遵朕旨更無可議之
事朕即降旨喀爾喀令勿踰扎卜堪等處矣朕為
大君統一中外天下衆生一體愛育今為廣教安
民罷息干戈彼此既咸歸于好當各飭所屬毋違
定約安生事端若遵守勿替則黃教自此愈興衆
生永享安樂之福爾又奏稱前請往藏熬茶實為

敬信喇嘛之故豈敢生事但帶往什物甚多百人
難以運致故此次不能與哈柳同來伏乞許用三
百人爾前以班禪額爾德尼圓寂之故欲使人入
藏熬茶誠心奏請朕已諭行止令人數毋過百今
爾又以運物百人未敷請增至三百人朕更加恩
允准爾須選擇曉事之人其赴東科爾朕當遣人
護送至貿易之事朕令大臣與哈柳定議亦如俄
羅斯例四年貿易一次人數不得過二百限八十

日還部來京者道出肅州西安其往肅州者亦以
四年為限數不得過百人除禁物外買賣各從其
便再爾部人來若與俄羅斯同在一年忌于爾等
無益今定于寅午戌年來京子辰申年至肅先期
以起程之日與何日可入境報知邊境大臣俟其
奏到當更遣官護理爾亦宜擇信實之人來時更
明白曉諭之無得滋事再台吉若別有奏請之事
仍更遣使減省僕從勿携貨物既入我境更令馳

驛前來此次台吉一一恪遵朕旨實心恭順朕甚嘉之用從前和好之禮隨勅賞各色緞十六端

三月丁未

命籌辦準噶爾進藏需用駝馬

辦理青海事務副都統巴靈阿奏言據總督鄂彌達等轉咨令于青海等處陸續採買駝馬以備夷使官兵牲畜疲乏更換之用青海山高氣冷五六月間青草萌生牲畜始肥今夷使于三

四月抵東科爾貿易事畢即行進藏倘所採買不免疲瘦恐有遺悞按西寧鎮標現有豫備駝一千餘隻馬一千六百匹臣請先以此項駝馬應用再按價給發營弁令其自購一轉移間兩有裨益軍機大臣等議覆應如所請奏入上從之

夏四月辛卯

命以色固蘇辦理後藏事務

駐藏副都統紀山奏言據郡王頗羅鼐告稱後藏班禪額爾德尼辦事尚卓特巴伊隆羅卜藏根敦病卒請以班禪額爾德尼之徒喇嘛色固鼐補尚卓特巴辦理後藏事務奏入

上從之

五月壬寅

定邊副將軍額駙策凌等奏定喀爾喀游牧界址

額駙策凌等奏言前值用兵魯令喀爾喀等游牧內移以翁金之布爾察克鄂爾昆之烏貴淖爾色楞額之喀喇托郭為界今噶爾丹策零乞和奉

旨以喀爾喀游牧地分飭令臣等定議臣查現今設立卡倫之扎卜堪齊克濟哈薩克圖庫克嶺等處自此以內三四百里就鄂爾海取中向南一帶至博羅椿濟塔爾喇布喀代汗淖爾黨那爾

台圖穆爾哈巴沙喇布魯都奇齊格訥之阿魯
通金鄂倫淖爾達蘭圖魯等處向北一帶至額
德爾齊德爾之伯勒齊爾準舒瑪勒台桑金達
賴喀喇塔爾阿勒坦噶達蘇等處定為外界其
內游牧人衆悉扎薩克圖汗格勒克雅木丕勒
部落即著格勒克雅木丕勒稽查不許踰越定
界並令駐劄烏里雅蘇台叅贊大臣時時遣人
巡察倘有越界游牧者從重治罪俟

命下之日飭各部落遵行軍機大臣等議覆應如所
請奏入

上從之

丙午

準噶爾部人噶克率弟巴圖來降

上諭軍機大臣等曰噶克等棄其妻子前來投順甚
屬可憫伊等未經出痘又無應詢之事無庸解京
可即由口外送往察哈爾交該總管安插其如何

賞賚之處著軍機大臣議奏尋議奏曰據噶克等
自言本係台吉無憑可查又向例單身投誠者
發天津等處安插今噶克等棄孥來歸應發察
哈爾授額外護軍并請賞給如例奏入
上從之

閏六月庚子朔

命諭準噶爾略地兵毋越定界

上諭軍機大臣等曰據額駙策凌奏稱叅贊大臣阿

岱報知噶爾丹策零遣得木齊旺扎爾錫喇卜等
率略地兵三十人來至喀勒占和碩卡倫臣令以
原議諭之止令巡視卡倫以外彼所應閱之地而
去額駙辦理此事甚合機宜觀此知噶爾丹策零
疑我布延圖等處卡倫以內尚有大兵駐劄故因
初次略地囑旺扎爾等直至喀勒占和碩卡倫探
視此非甚要之事不必遣使詰問然非明白曉諭
將來伊等游牧或仍越過阿爾台嶺俟彼使來時

爾等當告以天朝與爾台吉指定邊界者正欲喀
爾喀與爾厄魯特相距遼遠無由起釁庶彼此安
居樂業永歸和好故定議爾等游牧毋過阿爾台
山梁我喀爾喀游牧亦毋過扎卜堪等處又知噶
爾丹策零必懼我兵進駐科卜多故許其每年略
地時用二三十人至科卜多巡視以釋其疑然我
卡倫以內豈容爾等巡視乎今夏爾遣旺扎爾等
直至我沙扎海布延圖二處并欲至喀勒占和碩

卡倫內我將軍等遣人止之始還前所頒詔旨甚
明不宜有此事想非爾台吉所囑乃旺扎爾等誤
聽所致耳但既已定約詎可食言且爾等可至我
喀勒占以內巡視倘我略地之人亦至爾卡倫以
內爾亦聽之乎屢屢如此日後必起爭端致乖永
好之道彼此無益可明告爾台吉嗣後戒飭略地
之人勿因小事而誤大事也并以此旨行文額駙
策凌知之尋夷使莽鼐到京大臣等遵

旨詢問據莽鼎云此事噶爾丹策零實不知係略地
人之誤還時當告知噶爾丹策零即行戒諭可
也

甲子

準噶爾台吉噶爾丹策零遣使莽鼎等至京進
表

噶爾丹策零謹奏

大皇帝前哈柳歸奉

大皇帝勅書諭令厄魯特在阿爾台山陰游牧不得
過山梁喀爾喀亦不得過扎卜堪等處其科卜多
所在各令巡視又

許我進藏熬茶之人數至三百不勝歡忭

勅書有云原議本以阿爾台南哈卜塔克拜塔克烏
蘭烏蘇羅卜淖爾噶斯口為界今爾一切俱遵朕
旨更無可議之事是已蒙

諭旨見許也但

勅書內係蒙古舊語音我等尚未能盡解故遣哈柳
入奏懇求定界既以互相牽掣訖未定議復遣
吹納木喀入奏亦是此意去年哈柳奏到

大皇帝諭旨云罷兵息民永歸和好即定界與否亦
非要事但令彼此游牧互相隔遠我

皇祖時所設卡倫不得移動其科卜多等處朕亦不另
駐兵每年應略地時仍各遣二三十人巡視既免
相掣之嫌亦解爾疑惑之心朕不食言荷蒙

諭旨欲釋我疑懇將前此未能盡解之語再降

旨明示至進藏之事俟莽鼐信到即計日起程于八月二十日左右定到哈密由哈密即赴東科爾但必取道肅州則來人俱未出痘恐途中患病且道遠或遇無水草處無以接濟請一切生畜路費俱自行備辦由庫克沙什西喇喀勒占至東科爾貿易後前往至進藏時或馬匹疲乏尚需接濟伏乞

加恩為此謹

奏隨表敬獻玉碗一事貂皮三十張奏入報

聞

秋七月甲戌

命暫停查閱喀爾喀四部落豫備兵丁

上諭辦理軍機大臣等曰內扎薩克六盟長所豫備之兵丁器械連閱三年因伊等實心辦理訓練有方此次奉派之王貝勒台吉及官員兵丁等朕悉

加恩賞賚現今噶爾丹策零革心歸順一切恪遵
朕旨邊境無事若仍每年派員往喀爾喀閱兵各
蒙古須儲備牲畜往來承應不無勞費嗣後將每
年派員查閱之處暫行停止俟二三年後令理藩
院請旨奏派前往著傳諭王貝勒台吉官員等其
仰體朕軫恤蒙古至意將各屬兵丁仍不時操演
整頓軍械勿因暫停閱視之故遂至懈弛倘平日
怠忽從事兵不訓練器不完好致閱視大臣叅奏

朕斷不寬貸可諭令知之

乙亥

賜準噶爾台吉噶爾丹策零勅書

奉

天承運

皇帝詔曰諭噶爾丹策零爾使莽鼐齋至奏章言哈柳奉到勅書內有云原議以阿爾台南哈卜塔克拜塔克烏蘭烏蘇羅卜淖爾噶斯口為界今既一

切俱遵朕旨更無可議之事是以蒙諭旨見許但
勅書內係蒙古舊語音未能盡解是以屢次遣人
入奏訖未定議懇再降旨明示等語朕為大君不
分內外一體愛恤欲邊界民人不起爭端長享安
樂所以前歲勅書中言罷兵息民永歸和好則定
界與否亦非要事惟厄魯特毋過阿爾台游牧卡
倫設立如舊科卜多不更駐兵每年應略地時止
遣二三十人巡視彼此既無牽掣亦可釋爾疑惑

諭旨甚明以此台吉亦喻朕旨即此定議去年哈
柳來朕甚嘉之特以前者賜爾勅中原有令游牧
人等各安所居之言及爾還奏並未言及阿爾台
南游牧人等之事此事雖非緊要但前既議及後
不一一指明恐彼此游牧人等不知或妄行踰越
致起爭端有乖和好故朕之大臣面詢哈柳據云
以阿爾台山為界業已指明山南游牧之人仍居
舊地自不待言復有何議因此朕亦就此完結惟

諭喀爾喀等自今無得過扎卜堪齊克濟哈薩克
圖庫克嶺等處游牧而已今台吉又復懷疑祈朕
明降諭旨朕為天下大皇帝豈肯食言台吉固無
容過慮也又稱進藏之人若由肅州赴東科爾其
人悉未出痘又道遠恐乏水草請自備牲畜路費
由庫克沙什西喇喀勒占前進至進藏時或馬匹
疲乏尚懇加恩接濟爾前請進藏熬茶百人不敷
乞用三百人朕已允行至一切所需爾本以尊崇

佛教修行善事之故致誠前往此事固未便朕為
資助亦于台吉聲名有關但既經奏請倘由東科
爾進藏及由藏回時途間果有匱乏量為接濟在
朕固所不吝也至請路由庫克沙什等處朕邊境
大臣已詳詢習知道路者俱言此路既多戈壁又
缺水草行走甚難但爾來人未出痘者道經內地
誠屬可虞朕已飭令邊境大臣擇戈壁少水草好
有益于爾人畜者詳悉勘明導引爾人赴東科爾

爾人到時朕大臣當已豫為之備矣隨勅賜各色
緞十端加賞玻璃磁器四十事大緞六端

丙子

命喀爾喀王等及軍營大臣詳議撤兵後駐防事宜
上諭軍機大臣等曰朕前以撤阿爾台之兵詢問喀
爾喀王扎薩克等據奏言事尚未定若仍用兵戍
守于我等殊有裨益請暫留駐至去年噶爾丹策
零令哈柳來使一一遵照朕旨定議請伊等游牧

母過阿爾台山我之卡倫設置如舊至喀爾喀游牧亦無過扎卜堪其言甚屬恭順故朕遂頒勅書與噶爾丹策零指定喀爾喀游牧不得越扎卜堪齊克濟哈薩克圖庫克嶺等處仍以阿爾台山南哈卜塔克拜塔克烏蘭烏蘓羅卜淖爾噶斯口為界並所請熬茶貿易事亦經定議現今邊境寧謐既許其和西北兩路之兵不須留駐應行撤回北路喀爾喀扎薩克等當同心合志約束屬人就指定

邊界居住其豫備兵仍訓練以時至防秋之候行
圍會聚應略地時著額駙策零揀選幹員帶領二
三十人巡閱隙地準噶爾略地兵所到之處亦令
申報現設卡倫仍令喀爾喀台吉官員兵丁輪班
駐劄如此辦理則息事寧人而且有備無患矣著
行文喀爾喀四部落王扎薩克等令其于撤回內
地兵之後悉心協力休養屬下緊守卡倫一切防
範豫備事宜核議具奏倘謂內地兵斷不可撤回

竟如呼倫貝爾駐兵例令東省索倫烏喇齊等
揀發數千人携挈妻孥永遠駐劄游牧庶于事有
益若既與準噶爾定議而仍以內地兵戍守既恐
滋彼之疑且喀爾喀仍須供應一切妄費無益喀
爾喀副將軍王扎薩克等宜體朕為爾等籌畫之
意計及久遠妥議以聞并將朕此旨行文額駙策
凌與軍營大臣等令其詳悉定議具奏至西路又
與北路不同北路有額駙策凌與喀爾喀王扎薩

克等俱軍前諳練本地情形之人其防範豫備相機而行自無可慮西路則哈密與準噶爾連界回人素性怯懦非喀爾喀比內地之兵不便遽撤其屆期換班須從遠處調發亦非久長之計俟數年後量裁喀密駐扎兵務使足資防守外即以附近安西等處兵丁輪流撥往其兵數如何足用軍食如何支給著行文總督尹繼善提督李繩武詳悉定議具奏尋平郡王福彭大學士查郎阿左都御

史杭奕祿侍郎阿克敦等各以兩路事宜條奏

奏入

旨軍機大臣等議奏尋議覆曰據查郎阿請改安西
總兵官為提督增設官兵分駐哈密等處其現
在駐防兵丁悉行撤回前者雍正十三年臣等
魯酌議安西增設提督轄兵一萬各携家口移
駐其哈密換班兵丁即于提督標下輪班撥往
以總兵副將領之再豫選甘涼寧肅各營戰兵

二萬二千名以備調撥令其表裏相援移咨查
郎阿張廣泗等會議具奏其時查郎阿等議以
安西產物儉少食用不敷是以增設提督之議
未行今查郎阿請以安西總兵官改為提督增
兵三千合原額兵七千二百共一萬二百名就
中派撥二千名以副將一員率赴哈密駐劄二
年一換其現在哈密布隆吉爾等處駐防兵以
次撤回並與臣等原議相符實于邊防有益應

以查郎阿所奏移知陝西總督尹繼善提督李
繩武會同詳議具奏再行定議至杭奕祿奏請
哈密增駐蒙古兵一千為守卡用按前者副都
統旺扎爾侍郎玉保俱曾奏請未經議行杭奕
祿此奏亦無庸議再平郡王奏言北路駐防兵
可減不可撤阿克敦所奏亦大略相同應俟額
駙策凌等奏到後一并酌議具奏奏入

上從之

八月己未

命邊路各臺站歸將軍提督等官管轄

副都統旺扎爾奏言殺虎口等處臺站原為喀爾喀
衆蒙古接遞事件而設甚關緊要若無大員兼管必
致馬匹疲瘦并致缺少請以殺虎口邊路臺站令綏遠
城將軍管轄古北口邊路臺站令提督管轄獨石口
邊路臺站亦令提督管轄喜峰口邊路臺站令熱河
副都統管轄軍機大臣等議覆應如所請奏入

上從之

準噶爾部人庫本回民古爾班瑪特來降

命賞給安插如例

九月辛卯

準噶爾部人多爾濟及彭蘇克碩博爾鄂羅爾

巴額默根來降

命賞給安插如例

冬十月戊申

定邊副將軍額駙策凌及扎薩克等奏覆撤兵
防守事宜

額駙策凌等奏言奉七月初七日

上諭一應防守事宜喀爾喀副將軍王等另行議奏
外現在軍營兵五千俱應撤回內東三省二千
牧廠五百又塔米爾鄂爾昆守城直隸山西綠
旗兵一千俱乾隆三年到此請于明春青草生
時起程其呼倫貝爾兵一千察哈爾兵一千五

百又查濟爾瑪台種地宣化大同綠旗兵六百
今年始至請于明年秋起程但塔米爾鄂爾昆
所貯銀米器械甚多現在詳核造冊呈送軍機
處其應留應解之項請分別議覆又副將軍額
爾德厄畢西勒爾圖扎薩克圖汗格勒克雅木
丕勒等奏言由額駙策凌處接奉

上諭令臣等議奏防守事宜今四部落會議舊設卡
倫及接續卡倫之三路臺站仍令原駐台吉官

員管轄外其駐防烏里雅蘇台等處之喀爾喀
兵一千係與準噶爾接界備略地守卡探信之
用請仍派叅贊貝勒公扎薩克台吉統領駐劄
鄂爾昆等處駐防兵應增五百共一千名酌派
扎薩克官員管理駐劄其防秋操練兵三千名
仍令于秋令在鄂爾昆駐劄三月喀爾喀三副
將軍及衆扎薩克豫備兵一萬名仍令于游牧
處按時行圍操練派大臣查閱器械至撥索倫

烏喇齊兵挈眷久駐之處恐蒙古既乏米糧又
攜家散處有事調發反多牽掣似屬未便其巡
守卡倫若用蒙古人恐其怠惰乞仍派內地侍
衛駐劄為便軍機大臣等議覆俱應如所請惟
駐守卡倫既盡撤內兵請并用蒙古人奏入得
旨額駙策凌喀爾喀王扎薩克等議撤內地兵用喀
爾喀兵駐防哨探但喀爾喀兵斷不可無總管辦
事之人仍著額駙策凌督率軍務至佐理額駙捍

衛游牧查點器械整飭軍容等事尚需大員仍照
舊例自京師派二員前往更換駐防令伊等亦得
學習用兵之道再鄂爾昆烏里雅蘇台二處卡倫
若用喀爾喀兵駐防伊等既離本游牧處若不給
與資糧將何所倚賴其如何酌給之處著軍機大
臣一併議奏

癸丑

準噶爾部人阿爾佐率妻來降

命賞給安插如例

十一月壬申

酌辦官兵護送夷使進藏事宜

駐藏副都統紀山奏言準噶爾進藏之人若于八月間到哈密由邊外至東科爾時屆冬寒所有護送官兵或馬匹牲畜不無瘦乏應行換給今納克舒番子百戶等感戴

皇恩請于官兵過時所有四千九百八十六戶五戶

公出馬一匹牛二頭又每戶出羊一二隻以備
應用經軍機大臣等議覆曰前夷使莽鼐言進藏
人等當于本月到哈密至今絕無消息或噶爾
丹策零布施物件未備或與鄰境交兵均未可
定但護送官兵總宜豫籌接濟納克舒番子既
經備辦請移知烏赫圖巴靈阿若沿途取用納
克舒牲畜可于攜帶銀兩內如數給與價值奏

入

上從之

戊寅

授雅爾哈藍翎侍衛

軍機大臣等奏言俄羅斯遣使葛達班投遞伊
處薩納特衙門文書郎喀文書送到自準噶爾
脫出之護軍雅爾哈至京文書交內閣譯出進
呈雅爾哈請交本旗都統令在原差上行走奏入
得

旨雅爾哈著授藍翎侍衛在粘竿處行走賞銀五十兩

戊子

準噶爾部人圖魯孟克率壻達什夫婦來降

命賞給安插如例

己丑

定邊副將軍額駙策凌奏報鄂爾昆屯田收穫麥黍各糧七千九百四十石有奇得

旨下部知之

平定準噶爾方略前編卷四十五

欽定四庫全書

平定準噶爾方略前編卷四十六

乾隆六年春正月戊辰

命免陝甘二省兵丁借支銀兩

上諭內閣曰陝甘兩省自軍興以來出征兵丁等俱有賞賚而平時製備軍裝器械等項陸續借支司庫銀五十七萬兩有奇例應在本兵名下按季扣還者除年來已經扣除外西安司庫未扣銀約二

萬六千四百餘兩甘肅司庫未扣銀約一十七萬
六千餘兩前任總督鄂彌達以現今兵力不敷請
緩至五年之後營伍漸充公費稍裕再為扣除部
議以五年之內不免再有借支作何辦理行令總
督尹繼善議奏據稱此項銀兩應均作五年帶扣
如有營伍需用之處亦未便竟不借給應請酌定
數目不許過多指定限期不准過久以便隨同帶
扣等語朕思兵丁等現領之餉僅足供養給家口

之資若將新舊借支之項一併帶扣則所存無幾
食用艱難且此項借欠歷年已久若本人更換勢
必至貽累妻孥及該管之將弁朕心深為憫惻況
西陲軍興以來陝甘兵丁備極勤勞而甘省兵丁
尤為出力著將借欠未完帑銀二十萬二千四百
餘兩悉行豁免以示朕優恤邊兵之至意

甲戌

議安西改設提督事宜

大學士查郎阿奏言安西總兵請改設提督酌
增兵弁以成重鎮自嘉峪關以西哈密以東悉
令管轄甘涼肅諸營戰兵並聽其節制調遣其
哈密防兵悉量撤之止留兵二千以資分駐經
川陝總督尹繼善議覆與原奏相同惟所請增
兵三千查安西兵食全賴屯田現額徵糧一萬
餘石尚不敷兵丁七千餘人之食增兵三千并
家屬不下萬口支給更難請改中營遊擊為叅

將再增城守營都司一員千總一員把總二員
增兵五百馬三步七伴安西馬匹寬裕以便有
事調撥毋庸增設守兵靖逆改營為協增設副
將都司千總各一員把總三員兵五百名塔兒
灣常靖逆北面增設守備把總各一員兵二百
名赤金一營亦歸靖逆協管轄橋灣係通哈密
咽喉請以柳溝都司并原設兵二百名移駐橋
灣更增兵一百名改歸布隆吉爾遊擊統轄其

應增設兵即於駐防甘涼肅兵中有願於安西
等處入伍者就近酌留其駐防哈密兵既議全
撤即令該督於安西協并甘涼肅三處各撥兵
五百共二千名赴哈密防守以副將統之亦於
各標內揀選熟悉邊情者撥往二年更代大學
士等議應如所請奏入

上從之是日得

旨永常著補授安西提督現在夷使已到李繩武仍

著留原駐劄處同永常辦理一應事宜俟夷使熬
茶事畢再赴甘肅新任

議定撤兵事宜并給喀爾喀駐防兵丁口糧

大學士伯鄂爾泰等奏言現今有

旨撤兵其北路軍營滿洲察哈爾兵五千名綠旗兵
一千六百名據額駙策凌奏請東三省兵二千
令護軍統領阿林副都統圖納率之吉林蘇魯
克兵五百令副都統莫爾渾率之守城綠旗兵

一千令總兵官吳凱曾率之並於今年青草時起程呼倫貝爾兵一千察哈爾兵一千五百去秋方到應令少歇俟今秋令副都統銜烏勒德副都統濟昌率之起程其種地綠旗兵六百名雖撤兵後可停止種地但塔米爾鄂爾昆兩處倉庫所貯銀米器械甚多不可無人管守請暫留駐守護城池倉庫臣等議以呼倫貝爾察哈爾綠旗種地等兵並應如策凌所奏定議至東

三省吉林綠旗三項兵現今準噶爾遣使進藏
應俟其事已畢一體撤還內兵既撤用喀爾喀
兵駐防奉

旨加恩憫其勞苦議給糧餉查現在軍營存貯米石
甚多所有喀爾喀駐防烏里雅蘇台兵一千名
鄂爾昆兵一千名秋季防兵三千名俱每月給
銀一兩五錢米一斛其辦理糧餉原任巡撫法
敏應否仍留軍前伏候

欽定奏入得

旨此議甚善著依議所撤之兵俱令於本年九月起程法敏著仍留軍前阿岱著駐防烏里雅蘇台另派叅贊大臣二員前往著軍機大臣具奏請旨嗣軍機大臣等開列職名具奏得

旨著副都統慶泰前往塔爾瑪善著再留三年賞給額駙策凌軍營存貯什物

辦理軍機大臣等奏言軍營所有錢糧砲位烏

鎗器械什物甚多除錢糧收貯如故大銅砲四座物重道遠難運至京就近交綏遠城將軍收貯外所有子母砲過山鳥大小鳥鎗擇其好者半留軍營收藏備用其餘亦恐送京路遠應令喀爾喀兵運至綏遠城交將軍收貯至火藥鉛子硝黃繩索盔甲弓箭衣帽鞍屨一切雜項更恐年久朽壞或暫留以備將來賞賜或即給賞

何人候

旨遵行奏入得

旨著賞給額駙策凌

二月戊戌

上諭軍機大臣等曰西北兩路既仍有駐劄兵準噶爾遣使往來與一切緊要事件宜令兩路彼此通信知悉於事方有裨益著傳諭兩路將軍大臣知之

三月壬子

命酌留軍營侍衛

大學士伯鄂爾泰等奏言軍營向例用看視水草侍衛一十員今因撤兵額駙策凌等議俱撤還更遣十人前往竊思新經遣往之人原應明年期滿請酌留五人令於明年更代今年止遣五人往奏入

上從之

夏四月乙未朔

將軍烏赫圖等奏報準噶爾使臣齊默特等至
東科爾貿易

甲辰

命酌減臺站弁兵駝馬

管理臺站總管覺和托等奏言自張家口至鄂爾
爾昆大臺二十九中臺十五北路既經撤兵應
量汰之查大臺中臺里數無異宜令一體當差
勿分彼此請兩臺共用章京一員驍騎校一員

叅領四員領催四十四名輪流管理每臺酌留
十五戶馬甲五名烏拉齊二名馬二十匹駝二
十隻又第一臺至第十臺當京城軍營往返及
察哈爾左右翼蘇尼特四子部落毛明安歸化
城諸處傳遞事件總路不可照他臺裁減其間
十大臺七中臺各用馬甲十名烏拉齊十名馬
三十匹駝三十隻章京驍騎校領催等酌量存
留軍機大臣等議應如所請其西路臺站應否

裁減之處俟準噶爾熬茶事畢撤哈密兵時再
行定議奏入

上從之

準噶爾部人斡可濟爾噶爾達克巴等來降

命賞給安插如例

戊申

準噶爾部人羅卜藏來降

命賞給安插如例

壬戌

命籌辦準夷進藏駝馬

川陝總督尹繼善奏言熬茶準夷三百人至東
科爾臣等宣示

聖恩賞給米麵羊隻皆感激祇領交牧駝一千六百
餘隻馬一千一百餘匹深以馬駝疲乏難於涉
遠為憂查此次夷人原非進貢可比應聽其自
備資斧因噶爾丹策零詞語恭順蒙

恩豫備駝四百隻馬八百匹現在東科爾牧放倘尚
不敷請於西寧附近各營再行酌量撥給令其
作速赴藏臣已移知副都統巴靈阿撫臣元展
成熟籌妥辦理合奏

聞得

旨所奏俱悉雖云示恩亦不可啟其無厭之心也既
已如此辦理可令伊等知係殊恩後不得援以為
例

五月乙亥

命扎薩克等保護哲卜尊丹巴胡土克圖

上諭軍機大臣等曰從前準噶爾侵犯喀爾喀時窺伺哲卜尊丹巴胡土克圖

皇考特頒

諭旨令移住多倫淖爾今兵事已定經喀爾喀王等奏請哲卜尊丹巴胡土克圖仍移住庫倫準夷性甚狡詐今雖恭順乞和恐後復變更潛行窺伺亦未

可定著行文額駙策凌傳諭喀爾喀四部落副將
軍扎薩克等及駐劄庫倫之圖謝圖汗敦丹多爾
濟額駙敦多卜多爾濟等其如何保護防範之處
公同酌議具奏前胡土克圖在多倫淖爾時每年
遣侍衛二員在彼更番守護今在庫倫仍著遣往
胡土克圖所居之處得朕侍衛守護諸事便益胡
土克圖安穩之信朕亦不時得聞也

六月丁酉

護軍統領殷扎納遵

旨送班禪額爾德尼出世之瑚畢勒罕至後藏扎什

倫布廟坐牀

壬戌

命更定查閱驛站年期

張家口驛站總管覺和托等奏言今年既撤驛
站人夫駝馬一切事務俱屬簡少請自來年為
始臣與白泰輪流每年一人前往查閱軍機大

臣等議應定於三年內查閱兩次令覺和托白
泰輪班辦理奏入

上從之

己未

準噶爾部人孟克來降

命賞給安插如例

秋七月乙酉

準噶爾部人烏巴什來降

命賞給安插如例

八月丙申

命詰問準噶爾使臣齊默特等

護送夷使將軍烏赫圖奏言準噶爾使人於四月初一日到東科爾原定議五月赴藏因與商人貿易貨物索價昂貴稽遲時日託言炎暑請改期七月今於七月二十日齊默特等忽復來言我等本擬此月起程近聞西藏地氣早寒又

攜來駝隻俱不堪用難以前進擬貿易事畢即
欲還部既經和好熬茶之事不論何年俱可前
進臣等按準噶爾生性奸詭前後言辭反覆明
係希圖貿易價昂要請增給馬駝應否仍令赴
藏或聽其還部候

旨遵行奏入

上諭烏赫圖等曰前因噶爾丹策零尊崇黃教奏請
為其父赴藏熬茶施行善事朕特加恩允其所請

賞給牲畜口糧派大臣官兵照看今伊使臣因貿易價值不定不欲進藏即求還部貿易之事當聽商人自便詎可官為派勒今伊等不遂所欲便欲言歸或其來時噶爾丹策零本囑令如此或係伊等私意若出噶爾丹策零之意則亦係一無信行之流朕甚鄙之伊等去後倘再請進藏亦斷難允行若噶爾丹策零並未出此伊等自立主張任意主行更屬詭譎嗣後再來亦斷不遣往西藏伊等

果能擔承即聽其還朕為內外共主既經降旨斷
無改悔之理著將此旨給發烏赫圖曉諭伊等若
伊等知悔仍照原議辦理若必欲還部亦竟聽之
可也尋

上諭安西提督永常等曰準噶爾熬茶之人欲中道
而回此事雖尚在未定若彼執意欲回自無留彼
之理亦聽其回可耳至哈密時汝等當以失信大
義責之約束出境毋令生事不必如來時之接待

彼出境之後更宜小心防範俟過冬令再行請旨

庚戌

準噶爾部人孟克博羅特同來降

命賞給安插如例

乙卯

恩賞喀爾喀新設駐防官兵有差

定邊副將軍額駙策凌奏言內兵既撤所有駐防鄂爾昆之喀爾喀兵一千名防秋兵三千名

已令演習戰陣本月初五日臣等親身往驗器械旗幟俱甚整齊排列陣式放鎗射箭皆已熟練臣等仰體

聖主鼓舞官兵之至意酌議以軍營豫備獎賞之錦緞布疋等加賞值班副將軍郡王成袞扎布及公扎薩克台吉五名協理台吉十二名管旗章京九名叅領佐領驍騎校二十九名兵丁四千名以示鼓勵相應請

旨奏入

上從之

戊午

將軍烏赫圖等奏報準噶爾使臣齊默特等自

東科爾起程還部

冬十月丙申

命副都統索拜赴藏代紀山駐劄賞銀五百兩

乙巳

準噶爾部人額素克聶咱爾拜穆喇特等俱來

降

命賞給安插如例

壬子

準噶爾部人薩木湯庫本來降

命賞給安插如例

十一月丙寅

準噶爾部人塞音察克阿古薩喇和國賴等俱

來降

命賞給安插如例

十二月壬寅

命綏遠城等處密籌備兵事宜

上諭軍機大臣等曰尚書來保奏請先期派撥官兵以備不虞其言頗能慮遠經汝等議奏謂遽行派撥恐無知之人聲張揣度搖動人心大有關係亦甚合宜然兵可不用不可不備現今雖無用兵之

事倘適有調取刻期可集自當籌畫於事先者著
行文綏遠城將軍大臣等令其密為整備勿似出
師之狀伊等久在行間其統兵情形尤所稔悉一
切如何修整如何豫備之處苟留心經理自可不
數日而定必朝受命而夕可辦裝方無負邊閫重
臣之寄著將辦理緣由詳悉曉示并諭官兵等共
知之

乾隆七年春正月戊寅

恩免那克素番民應輸錢糧

上諭內閣曰據副都統紀山奏稱前因準噶爾請進藏熬茶派官兵護送令那克素三十九部落番民等豫備馬匹牲畜接濟應用伊等率先集事惟恐後時甚屬急公且伊等頭目入見俱言蒙國家養之恩從無擾累各得安生惟願誠心報効等語此次準噶爾未曾進藏伊等所備之馬匹牲畜雖未經應用但番民生長邊遠感戴國家之恩寵勉

報効甚屬可嘉宜施特恩著將伊等今年應輸錢糧盡數寬免以示鼓勵

丁亥

準噶爾部人羅斯瑪特多喇特率親屬五人俱來降

命賞給安插如例

二月丙申

駐防哈密安西提督李繩武奏報準噶爾使臣

至哈密情形

李繩武奏言準噶爾使臣吹納木喀於正月十八日入境二十二日到哈密據云赴京進

貢并去歲蒙

大皇帝恩許熬茶齊默特等去藏不遠中途而返恐大皇帝見責故遣我等前來謝罪并懇仍許熬茶奏
入得

旨朕已料彼必為熬茶之事再來陳請也

三月辛巳

準噶爾使臣吹納木喀等至京進表請

安並貢方物

準噶爾台吉噶爾丹策零謹奏

乾隆大皇帝前

世宗憲皇帝時謹遵頒發根敦等

諭旨是以兩次遣特磊至京懇請進藏熬茶至第二次
留我部兩人編旗受爵并令我師以羅卜藏書

努多爾濟塞卜騰塞卜騰旺布及其族衆悉送
還若過八十日大兵當取途前進並以難行之
事相要遂生釁端是釁非由我而起也後遣使
者傳爾阿克敦來謂彼此相持不特兵民被累
兼之糜費糧餉牲畜宜各罷息干戈以安衆生
決不食言我部之人謂既經用兵又許和好是
不得已而出此竊念用兵以來衆生實受其累
若得許和既可享福并有美名所以屢遣使至

京定議奉

大皇帝諭旨我朝所設卡倫駐劄如舊爾等亦許每
年遣二三十人至科卜多巡視去秋遵

旨遣人至科卜多守卡人等反云並無此

旨不許我人前往再赴藏熬茶之事奉

大皇帝諭旨令以三百人往既至哈密更令大臣等
護視揀水草好處由東科爾次第進藏還時并許
資助糧餉馬匹至貿易之事除禁物外悉令任便

買賣比我使人赴哈密引路之人遶道遠由戈壁
水草俱惡人既困乏馬多倒斃及至貿易之地
並不遵

大皇帝諭旨乃禁止我人入市俱令一二人來議且
減少價值不得速售欲攜往西藏又不許遂至
留住四月雖去藏不遠不得前進半道而返又
至京貿易之事奉

旨限定人數年分許由肅州西寧路因念從此至京

道遠費多恐攜物不敷所用以上三事雖前此業已定議今遵議而行尚有委曲未便之處既蒙和好可否令我赴藏者由噶斯路則道近而水草亦便至京貿易者由歸化城路其往多巴西寧貿易者亦走噶斯之南并乞勿限定年分至巡視科卜多請如前降

諭旨每年遣人前往如蒙

恩允事事便益永遠遵行於和好之道尤便伏乞

大皇帝睿鑒隨表進貂皮三十張奏入報

聞

壬午

勅諭軍營將軍大臣等

上諭軍機大臣等曰覽夷使吹納木喀齎至噶爾丹
策零奏章意甚狡詐朕斷不因言辭觸怒遽爾興
兵亦不可不密為整備著移知兩路軍營大臣令
伊等加意防範其奏內情形并詳悉寄知

勅諭提督永常

上諭軍機大臣等曰提督永常駐防哈密察其辦事
尚不能深知準噶爾性情有藐視之意凡事思易
則難思難則易慎其難而毋忽其易則功可成而
無後悔準夷性本詭譎不可與我喀爾喀等一體
相待應將此故密飭永常令其於一切事務俱留
心辦理

夏四月庚寅朔

準噶爾使臣吹納木喀等入

覲

上諭吹納木喀等曰爾台吉噶爾丹策零奏章朕已
入覽令爾口奏之語朕之大臣悉以聞前噶爾丹
策零以其父故屢懇赴藏熬茶朕廷臣議應勿許
朕施特恩念其為父諷經尊崇黃教自屬善事降
旨允之復遣大臣官兵護送助以牲畜口糧乃爾
使齊默特等既至東科爾惟以貿易為事遷延數

月並不進藏遽欲還部朕之大臣屢諭不聽始以奏聞朕時在木蘭降旨此係噶爾丹策零奏懇之事若等何得擅還或其來時噶爾丹策零本如此受意則嗣後復欲遣人進藏決不允行令朕之大臣再三開示若等執意起程想此意定出自噶爾丹策零不然雖彈丸小部落必無使臣不遵主命之理即如爾等此來除噶爾丹策零所囑外可任意增一辭乎汝至肅州即返可乎既乞往藏半途

而還更造為種種不根之語欲變易成規非故滋事乎汝謂奏䟽中並無傲慢朕大臣等悉能通汝等語言汝豈能隱匿乎朕為天下共主已許爾息兵斷不因此遽復興兵汝等若有妄舉亦聽之而已此次噶爾丹策零所奏與汝口奏互異朕實不解諸事難以定奪汝明記朕言詳諭噶爾丹策零可也吹納木喀奏云噶爾丹策零竭誠輸懇奏章所載乃中外言語不同之故實非傲慢其言及

往事只以

大皇帝有愛育羣生闡揚黃教之訓自陳歡感並無
他意至進藏熬茶乃奏乞

大皇帝施恩允行之事齊默特半途而返據其言云
以攔阻之故又奉

旨巡視科卜多據我巡視者云不令伊等巡閱噶爾
丹策零並疑惑不信謹聲明始末令使臣等來
剖晰至喀爾喀蒙古人等並

大皇帝屬下我等豈敢侵犯生事惟是奏中所請三
事允行與否恭候

大皇帝睿鑒又奉

上諭曰汝稱噶爾丹策零不信齊默特故來具奏今
奏中何無此語進藏熬茶本噶爾丹策零最切要
事當遣可信之人奈何委之齊默特伊等還時降
旨甚明今汝等縱仍欲進藏亦應候朕再降旨允
行然後得往豈容竟自主張但以道由噶斯為詞

乎噶斯豈汝等境內乎抑聞朕前諭難以再請姑
以此含糊嘗試乎原議巡視科卜多並無許入卡
倫內巡視之語去年爾人不言巡視科卜多直入
布延圖卡倫至喀勒占和碩卡倫朕之大臣始禁
止之朕所遣略地之人有越阿爾台巡視爾卡倫
以內之地者乎此事已明示蟒鴈矣爾等豈不知
之至來京貿易者不得由綏遠城亦與哈柳定議
尚未經行一次遽欲更張可乎噶爾丹策零此次

所奏言辭不倫左右支吾殊非和好之道朕業已降旨息兵汝又稱實無傲慢之意朕亦不介懷如果誠心懇乞俟再遣使來此次姑無庸議朕另有勅書付汝齎去吹納木喀又奏云前者齊默特還並不以

大皇帝諭旨告知噶爾丹策零是以衆心懷疑此來何敢妄奏進藏一事在噶爾丹策零最為切要
伏祈

大皇帝恩允

上諭曰此事不得允行之故噶爾丹策零亦所明知
況人數日期俱未議定朕即加恩豈可令我護送
官兵先勞守候乎天時近暑汝等可作速起程朕
已諭我大臣為汝等辦理矣

甲辰

勅諭準噶爾台吉噶爾丹策零

奉

天承運

皇帝詔曰爾奏中謂前此興戎釁非由爾又謂使臣傳檄前來事非得已追論舊事為此非分大言又謂奉大皇帝諭遣人巡視科卜多為守卡人攔阻使使往藏熬茶留數月不遣半道空還定議至京貿易遶道力疲不能前進嗣後須取道噶斯伏祈睿鑒夫興戎起釁實由爾國前諭已明額爾得尼招大捷之後方行遣使我大國有何不得已而出

此耶瀆理前說意果何為豈又欲借端生事乎朕
為天下共主業已降旨息兵豈肯食言爾欲起釁
朕亦不禁也定議巡視科卜多有巡視卡倫以內
之語乎爾人由布延圖直至喀勒占和碩卡倫我
始禁阻我人有過阿爾台至爾之卡倫內巡視者
乎其事雖小然屢違定約豈合於和好之道朕允
爾赴藏熬茶者亦鑒爾至誠故遣官護送豫備牲
畜爾人至東科爾數月惟圖貿易不思進藏竟自

還部誰為阻止乎如欲阻止何如不允爾奏之為
愈也且齊默特欲還朕降旨詢問或來時噶爾丹
策零囑爾或出爾等之意倘出噶爾丹策零則彼
亦一絕無信行之人嗣後豈容復請乎今即復欲
進藏亦必懇朕降旨始可遵行如何遽作前去之
計惟以道出噶斯為請況人數日期俱在未定豈
有令朕之大臣官弁虛糜廩餼先勞守候乎以此
問吹納木喀據稱噶爾丹策零實不知始末如此

惟不信齊默特語故令我等前來問明并輸誠意
乞大皇帝施恩一切朕已明諭吹納木喀至貿易
之事本與爾使哈柳定議並未遵行一次如何又
欲更張請取道噶斯乎此次爾所陳奏不合事理
念爾亦未深知將奏請之事暫行停止令吹納
木喀傳諭於爾勅書亦令齊往隨勅賞各色緞十
端磁器十件大緞六端

五月丁丑

準噶爾部人咱木巴喇克爾伯來降

命賞給安插如例

六月庚寅

準噶爾部人阿爾咱來降

命賞給安插如例

秋七月辛巳

準噶爾部人翰克穆爾來降

命賞給安插如例

八月辛亥

準噶爾部人三津根敦扎卜舒翁噶爾察克鄂爾謨泰薩里松布庫沙喇六人同來降

命賞給安插如例

九月辛酉

準噶爾部人都噶爾來降

命賞給安插如例

甲戌

命獎賞喀爾喀四部落軍容整頓者

定邊副將軍額駙策凌奏言今年臣等會議令
叅贊大臣都統塔爾瑪善於七月二十日赴塞
勒壁口閱副將軍公巴素部落二十一旗兵丁
扎薩克公扎木輝一旗器械堅利技勇熟練為
最車臣汗達瑪琳郡王德木楚克巴扎爾什第
貝勒旺扎爾貝子彥楚卜多爾濟公格勒克巴
木丕勒扎薩克台吉袞楚克扎卜沙克都爾扎

卜旺楚克達爾扎貝子旺扎爾公巴素策凌旺
布薩木丕勒扎薩克台吉齊呼喇成衮扎布策
黨敦多卜齊旺旺扎爾博洛勒十九旗次之扎
薩克格勒克一旗又次之於八月初二日赴烏
克圖爾濟爾哈朗閣副將軍成衮扎布部落十
九旗兵丁扎薩克貝勒策卜登台吉彭楚克阿
喇卜坦策卜登三旗器械堅利技勇熟練為最
圖謝圖汗敦丹多爾濟親王敦多卜多爾濟郡

王成衮扎布桑寨多爾濟策凌拜多卜公蒙固
巴木丕勒多爾巴海扎薩克台吉齊巴克扎卜
策凌旺舒克達什丕勒林丕勒多爾濟旺扎爾
三都卜多爾濟十四旗次之扎薩克台吉遜多
布旺布多爾濟二旗又次之令叅贊大臣副都
統慶泰於七月二十日赴桑金托羅海閱署副
將軍世子成衮扎布部落二十二旗兵丁將軍
王額駙策凌貝子車木楚克扎布公丹巴多爾

濟咱雅班第達胡土克圖四旗器械堅利技勇
熟練為最親王得親扎卜貝勒那木扎爾車蘇
隆貝子多爾濟旺舒克公根丕勒扎木禪旺扎
爾齊旺塞內扎薩克台吉巴朗額林沁額默根
春丕勒布達扎卜阿寶羅卜藏敦多卜特克什
來冲扎卜額爾德尼班第達胡土克圖十八旗
次之於七月二十五日赴哈里勒邁閱喀爾喀
副將軍貝勒青滾雜卜十五旗兵丁扎薩克伊

達木扎卜一旗器械堅利技勇熟練為最貝勒
策登扎卜公旺舒克策魯卜精珠木多爾濟多
爾濟策登扎薩克台吉喇卜坦六旗次之扎薩
克圖汗巴勒達爾公旺扎爾旺沁扎卜台吉米
玉特多爾濟班第五木布濟羅卜藏喇卜坦貝
勒青滾雜卜又次之奏入得

旨諸部落軍容整頓者諭部議賞具奏

冬十月丁亥

準噶爾部人巴圖爾率屬三人來降

命賞給安插如例

甲午

命法敏富德來京以原任按察使劉栢辦理軍營糧

餉事務

十一月丁巳

命厄魯特等投誠者不必當差

正白旗蒙古副都統策凌奏言額外護軍多爾

濟等並自準噶爾向化投誠蒙

恩給賞妻奴房屋授以額外護軍支給月糧野性漸馴當與蒙古一體効力當差歲久著有勞績亦得量授官職其傲惰者治罪如例辦理軍機大臣等議曰準夷投誠人等嘉其向化

恩施優渥伊等贍養有資遵守約束安全之道已屬盡善何必藉其材力以備驅使若必以蒙古一例常差殊非安戢遠人本意且自雍正六年至

乾隆七年來降者凡三百三名計發往察哈爾
寧古塔天津江寧杭州青州安插者已二百五
十三名其在京者厄魯特僅二十三人回民僅
二十七人為數無多不必派令當差俟其子孫
長成所轄佐領或送補額甲或令當差另行辦
理奏入

上從之

癸亥

準噶爾部和通賽音察克來降

命賞給安插如例

甲子

準噶爾部人卓特巴率屬十三人來降

命賞給安插如例

乙丑

準噶爾部人懇澤與第圖倫俱率妻來降

命賞給安插如例

壬申

準噶爾台吉噶爾丹策零遣使吹納木喀等至
京進表謝罪並乞許赴藏

噶爾丹策零謹奏

大皇帝前遣吹納木喀起程後訊問齊默特汝赴藏
熬茶既到東科爾忽中道而回諒

大皇帝前旨允行定無更改必汝有別故正詰問間
吹納木喀適回齋

諭旨至備知其奉

旨不遵擅自回巢已正其罪并没其家矣欽奉

上諭爾此次復請進藏人數時日俱未定議不可令

護送大臣等虛糜守候暫行停止

聖慮周詳曷勝感激今謹遵前

旨人數用三百名定期三月初起程初遣之人自應

攜帶熬茶物件請先至多巴西寧貿易備物前

往并請道出噶斯庶程近而水草茂人畜俱便

如蒙

允行更請人分兩起赴藏熬茶者由默勒占庫車路
進發往多巴西寧者由哈濟爾得卜特爾柴達
木至多巴西寧再由多倫鄂摩渡口過穆魯烏
蘇進藏又奉

諭旨爾人巡視科卜多者反進布延圖卡倫直至喀
勒占和碩我守卡之人始禁止之按喀勒占和碩
我等實不知有此地名並無令過科卜多巡察

之語乃我人錯會耳前已降

旨定議請仍遵前

旨每年巡視至托爾輝而止又通商之事前哈柳所
奉

諭旨令赴京貿易者道由肅州陝西其路實險遠難
行往者和好時入京貿易並由歸化城赴多巴
西寧聽其自便現今喀爾喀蒙古並許其由歸
化城進京由青海至多巴西寧獨不允我等者

中朝大臣恐我等與喀爾喀青海人交接耳前
此多什布濟爾等嘗由喀爾喀歸化城進京去
歲進藏者亦由青海至東科爾何嘗滋事况蒙
大皇帝許以和好自今豈敢背約妄行惟祈

睿鑒又

諭旨有云爾所陳奏不合事理與吹納木喀口奏之
言互異幸蒙

大皇帝推心結好輸誠入奏安敢有冒瀆之心或者

彼此語言不同之故伏乞寬宥餘令吹納木喀

口奏祈

大皇帝鑒之隨表謹貢玉碗一具馬二匹貂皮三十

張奏入報

聞

已外

命烏赫圖玉保護送準噶爾使臣赴藏

上諭軍機大臣等曰準噶爾進藏熬茶者朕已加恩

照所請行其總理護送仍令將軍烏赫圖及侍郎
玉保前去著曉諭烏赫圖即備辦一切應行事件
尋大學士等奏玉保應於明年二月間自京起
程即往西寧接應來使奏入得

旨命賞烏赫圖銀一千兩玉保二千五百兩以備在
途需用

甲申

準噶爾使臣吹納木喀等入

覲

上諭吹納木喀等曰噶爾丹策零奏表朕已覽訖令爾口奏語大臣等亦以聞噶爾丹策零深知爾部之人誑語妄行據實引罪詞甚恭順朕已知悉又言從前所奏非敢冒瀆因中外言語不同之故懇乞寬宥此亦小過朕不介意朕為大君豈有聞一甘言即喜聞一非理之言即怒者乎凡事惟據理剖斷理可行即允之不可行縱懇乞再三亦不允

也即如噶爾丹策零乞為父進藏熬茶朕既允行
來使忽半路而回今復申前請本宜勿許但念彼
實為其父之故心誠而語順故朕仍加恩允之并
懇道出噶斯此次亦姑從所請但所遣三百人若
分二起不特我之護送者難於兼顧爾等亦轉多
勞費且先行赴藏者豈能久駐以待商人乎止應
仍作一起或徑自爾國由噶斯入藏否則同至西
寧貿易事畢由多倫鄂摩入藏爾等自酌之可也

來時當告我守邊大臣由何路往朕仍賞給牲畜
路費遣官護送吹納木喀奏言噶爾丹策零所奏
既蒙

大皇帝洞鑒我等謹記

大皇帝諭旨還告噶爾丹策零前者荷

恩賞給牲畜路費今謹謝

恩

上諭曰噶爾丹策零前次請貿易者不拘人數年期

所往亦從其便既已定議豈容數改現今與爾貿易之俄羅斯回人有任其自往自來者乎無論準噶爾人即我喀爾喀部落出入邊口必自部給票驗明許過亦爾等所知欲永遠和好豈可但記一時之便若謂道遠費多俄羅斯較爾更遠何以往來不絕且貿易乃民事從無官為辦給者今許爾換給馬駝即朕之特恩也又原議巡察科卜多並未指及托爾輝今噶爾丹策零以此為言特恐彼

處駐兵耳朕既降旨罷兵斷不食言若復生疑即如所請每年秋冬遣二三十人來令我守卡者率往爾等亦須嚴飭來人毋得生事吹納木喀奏言所請並蒙

大皇帝洞鑒此外別無所奏使臣往來數次今年亦老矣惟懇

大皇帝加恩和好之事永遠不渝

上諭曰果噶爾丹策零勿萌異心即能永遠爾病已

痊否爾等何時起程吹納木喀奏言使臣年老途
中復感寒暑蒙

大皇帝遣醫診治得愈今日瞻仰

天顏更百病皆除俟貨物換就即起程還部矣

上諭曰爾等行期不遠朕尚欲加恩賜宴令爾等觀
賞百戲也

平定準噶爾方略前編卷四十六